



# Жаңа

zhanaomir@bk.ru

МАҢҒЫСТАУ АУДАНЫҚ ҚОҒАМДЫҚ-САЯСИ ГАЗЕТ

# ӨМІР

№6 (10638)

13 ақпан 2025 жыл

Газет 1941 жылдың 27 желтоқсанынан шыға бастады

www.mangystaumedia.kz

Газет әр аптаның бейсенбі күні шығады

## МАҢҒЫСТАУ ОБЛЫСЫ ӘКІМІНІҢ ОРЫНБАСАРЫ ТАҒАЙЫНДАЛДЫ



ҚР Президенті әкімшілігінің келісімі бойынша, өңір басшысы Нұрдәулет Қылыбайдың өкімімен Асқар Қаныбеков Маңғыстау облысы әкімінің орынбасары қызметіне тағайындалды. Қаныбеков Асқар Сәкенұлы Алматы қаласында дүниеге келген, білімі жоғары. Өл-Фараби атындағы Қазақ Ұлттық университетінде «Мемлекеттік және жергілікті басқару» мамандығы, Оңтүстік Қазақстан мемлекеттік университетінде «Экономика» мамандығы бойынша білім алған. Еңбек жолын салық инспекторы қызметінен бастап, Шымкент қаласы кәсіпкерлік және ауыл шаруашылығы бөлімінің бас маманы, Алматы облыстық мәдениет басқармасының ішкі бақылау қызметінің бас маманы, Алматы облысы Көксу ауданы Еңбекші ауылдық округінің әкімі болды. 2013 - 2018 жылдар аралығында Шымкент қаласының кәсіпкерлік бөлім басшысы, Оңтүстік Қазақстан облысының ауыл шаруашылық басқарма басшысының орынбасары болды. Сондай-ақ Қазақстан Республикасы мәдениет және спорт министрлігінің әкімшілік департаменті директорының орынбасары қызметін атқарды. Сонымен қатар, төрт жыл Шымкент қаласының ауыл шаруашылығы және ветеринария басқармасының басшысы болды. Осыған дейін Түркістан облысы аппарат басшысының орынбасары қызметін атқарды.

### ЖАҒЫМДЫ ЖАҒАЛЫҚ

## ЗАМАНАУИ ЖОЛАУШЫЛАР АВТОБУСЫ ЕЛ ИГІЛІГІНЕ БЕРІЛДІ

**А**пта басында алғаш рет «Ақтау-Жаңаөзен-Ақтау» бағытына және Маңғыстау ауданындағы ауылдарды аудан орталығы – Шетпе ауылымен байланыстыратын жаңа, заманауи және комфортабелді автобустар жүре бастады.

Алғашқы рейс таңғы 09:00-де Ақтаудан жолға шықты. Жаңа бағыттардың ашылу рәсіміне аймақ басшысы арнайы қатысып, 20 автобустың кілтін табыстады. Облыс әкімінің айтуынша, қазіргі таңда Маңғыстау облысы бойынша автобус паркі 90%-ға, ал Ақтау қаласында 100%-ға жаңарған. - Мемлекет басшысы Қасым-Жомарт Тоқаев халықтың өл-ауқатын арттыруды басты назарда ұстайды. Соның бірі – қоғамдық көлікпен қамту мәселесі. Бұл бағдарлама Маңғыстау облысында 2020 жылы басталып, бүгін нәтижесін беріп отыр. Өңір тұрғындары Жаңаөзен қаласына және ауданішілік бағыттарда кең әрі жайлы туристік автобустармен қатынай алады. Жол ақысы қолжетімді, қызмет сапасы жоғары автобустар халық игілігі

үшін жасалды. Алдағы уақытта бұл жұмыстар жалғасады, – деді Нұрдәулет Қылыбай.

«Ақтау-Жаңаөзен-Ақтау» бағытында «Yutong» маркалы, 51 орындық, үлкен класты автобустар жолаушыларға барлық қажетті жағдаймен қамтамасыз етілген. Автобустарда санитарлық торап (деретхана), желдеткіш және жолаушылардың жол бойы жайлы уақыт өткізуі үшін теледидар қарастырылған. 12 ақпаннан бастап 6 автобус күн сайын таңғы 07:00-де Ақтау қаласынан – 31 шағынаудандағы Сары базар жанындағы автотұрақтан, ал Жаңаөзен қаласынан – Жібек жолы базары аумағындағы «Өзен» сауда үйінің алдынан жолға шығады. Жол жүру ақысы ересектер үшін – 750 теңге, 7-18 жас аралығындағы балалар үшін – 375 теңге. Ал Маңғыстау ауданының орталығы Шетпе ауылын ауылдармен



байланыстыратын жолаушылар тасымалы үшін «Yutong» маркалы, 24 орындық, кіші класты жайлы автобустар бөлінді. Енді тұрғындар Шетпе ауылына және Шетпе-Қызыл-Ақшымырау, Шетпе-Тұщықұдық-Шебір, Шетпе-Онды, Шетпе-Ұштаған, Шетпе-Шайыр, Шетпе-Жармыш, Шетпе-Сайөтес, Шетпе-Тұщыбек-Жыңғылды бағыттары бойынша қатынай алады. Жолаушыларға барлығы 14 автобус қызмет көрсетеді. Айта кетейік, жаңа автобустар «Өнеркәсіпті дамыту қоры» АҚ-ның қаржылық қолдауымен алынды.

### АУЫЛ-АЙМАҚ

## ЭКОЛОГИЯЛЫҚ ТЕҢГЕРІМДІ ТҰРАҚТАНДЫРУ МАҚСАТЫНДА СЕКСЕУІЛ ӨСІРУ СӘТТІ ЖАЛҒАСУДА

**Маңғыстау облысында экологиялық ахуалды жақсарту мақсатында жоспарлы жұмыс белсенді жүзеге асуда.**

2004 жылдан бері Сенек ауылында басталған құм тоқтату жұмыстары, кейіннен Ұштаған, Тұщықұдық және Шебір ауылдарында жалғасын тапты. Бұл жобалардың негізгі мақсаты – ауылдарды көшпелі құмнан қорғау, яғни сексеуіл өсіру арқылы экологиялық тепе-теңдікті қалпына келтіру, - деп хабарлайды қоғамдық коммуникация орталығы. Деректерге жүгінсек, Ұштаған ауылында 2007, ал Тұщықұдықта 2012 жылдан, сондай-ақ Шебірде 2016 жылдан бері сексеуіл отырғызу жұмыстары жүргізіліп келеді. Нәтижесінде, әр ауылда


2021 жылға дейін жалпы 3329 гектар жасыл белдеу пайда болған - 2022 жылы бұл алқап Маңғыстау облысы әкімінің қаулысымен «Бейнеу ормандар және жануарлар дүниесін қорғау» КММ-нің құрамына берілді. 2018 жылы Маңғыстау ауданының Жарма, Сазды және Сауысқан ауылдарында 134 гектар аумақты құм көшкінінен қорғау бойынша 6 жылдық жоба жасақталды. Жобаның бірінші кезеңінде 2022-2024 жылдар аралығында 60,34 гектар аумаққа 203 634 түп сексеуіл мен жүзгін ағаштары отырғызылды. Бұл кезеңнің шығымдылығы 85-90% құрады. Екінші кезеңде 2025-2027 жылдары қалған 73,74 гектар аумаққа 248 887 сексеуіл мен жүзгін ағаштарын отырғызу жоспарланып отыр. Мемлекет басшысы Қ.К. Тоқаевтың 2022 жылғы Маңғыстау облысына жұмыс сапары барысында берген тапсырмалары



негізінде, Бейнеу ауданының Тәжен, Сыңғырлау, Сам, Тұрыш және Ақжігіт, Қарақия ауданының Сенек және Бостан, Маңғыстау ауданының Жармыш және Ақшымырау, Түпқараған ауданының

Таушық елді мекендеріндегі қауіпті золдық процестердің даму қаупін анықтау мақсатында жобалар әзірленді, - деп атап өтті Маңғыстау облысының табиғи ресурстар және табиғат пайдалануды

реттеу басқармасы басшысының орынбасары Хайдар Түлеушов. Жергілікті бюджеттен 72,5 млн. теңге бөлініп, толықтай игерілді. Жоба 2025-2032 жылдар аралығында жүзеге асырылатын болады. Жалпы 10 ауыл бойынша жобаның құны 2 968,0 млн. теңгені құрайды. Қорытындылай кетсек, 2025 жылдан бастап кезең-кезеңімен аталған ауылдардың шөлейттенуіне қарсы сексеуіл өсіру жұмыстары жалғасады. Бұл шаралар экологиялық ахуалды жақсартуға, жердің құнарлылығын арттыруға және ауыл тұрғындарының өмір сапасын көтеруге бағытталған. Маңғыстау облысында жүргізіліп жатқан бұл жұмыстар тек экологияны қорғап қана қоймай, сонымен қатар ауыл тұрғындарының әлеуметтік-экономикалық жағдайын да жақсартуға ықпал ететін болады.





ЖАҢА ОРТАЛЫҚ

# ОТАН – ОТБАСЫНАН БАСТАЛАДЫ



**Мемлекет басшысы Қасым-Жомарт Тоқаев «Әділетті Қазақстан: Заң мен тәртіп, экономикалық өсім, қоғамдық оптимизм» атты Қазақстан халқына Жолдауында: «Әлеуметтік тұрғыдан осал азаматтарға қолдау көрсету – өте маңызды міндет....**

Мемлекеттік қолдау шын мәнінде мұқтаж адамдарға көрсетілуі қажет. Бір сөзбен, кез келген әлеуметтік көмек әділ, ашық және тиімді болуға тиіс», - деп атап өткені белгілі. Осы орайда еліміздің түпкір-түпкірінен Отбасын қолдау орталығы ашылды. Бұл орталық бытыр біздің ауданымызда да өз жұмысын бастады.

Қиындыққа тап болған және отбасылық зорлық-зомбылықтың зардабын тартқан әйелдер мен олардың балаларына арналған қолдау орталығының негізгі бағыты – мемлекеттің отбасылық саясатын жүзеге асыру, өмірлік қиын жағдайға тап болған адамдарға қолдау көрсету, тұрмыстық зорлық-зомбылыққа ұшыраған жандарға қолдау көрсету. Орталықтың жұмысы туралы мекеме басшы Мұхтар Мүтәлпаловқа мақсат пен міндеттері қандай, бұл мекеменің атқаратын қызметін халыққа толық түсіндіріп өтсеңіз деп хабарласқан болатынбыз.



– Маңғыстау ауданы әкімдігінің «Отбасын қолдау орталығы» коммуналдық мемлекеттік мекемесі өз жұмысын бастады. Басты мақсат - тұрмыстық қиындыққа тап болған әйелдер мен отбасыларға психологиялық, заңгерлік және әлеуметтік қолдау көрсету. Мұнда өмірлік қиын жағдайларды еңсеруге көмек көрсетіп, азаматтарға жаңа мүмкіндіктер ұсынатын, өмірдегі қиын жағдайды еңсеру үшін жан жақты қолдау көрсететін мамандар жұмыс істейді. Сондай-ақ, отбасы институтын жан-жақты қолдау және нығайту, азаматтардың жекелеген санаттарына кешенді қызметтер көрсету, отбасы институтын нығайту жөніндегі іс-шараларды ұйымдастыру және өткізу болып табылады. Аты айтып тұрғандай отбасыларға,

қиындыққа тап болған азаматтарға қолдау көрсетуден өзге коммуналдық мемлекеттік мекеме қызметінде мақсаттарына қайшы жасалған мәміле, Қазақстан Республикасының шектеулі заңдарында немесе құрылтай құжаттарында немесе басшының жарғылық құзыретін бұза отырып, жасалған мәміле уәкілетті органмен, прокурордың талабы бойынша жарамсыз деп танылуы мүмкін.

**Сонымен қатар, орталықтың көмегіне жүгінген адамдарға:**

- 1) мемлекеттік отбасы саясатының шараларын, оның ішінде некені және отбасыны сақтау, отбасылық жанжалдарды шешу жөніндегі шараларды іске асыру;
- 2) өмірде қиын жағдайға тап болған адамдарды (отбасыларды) өз құзыреті шегінде

мемлекеттік органдардың қолдауымен, оның ішінде интеграцияланған модель арқылы қолдаумен қамтуы жөніндегі жұмысты үйлестіру;

3) өмірде қиын жағдайға тап болған адамдарға (отбасыларға) әлеуметтік, заңдық және психологиялық қолдау көрсетуге жәрдемдесу;

4) тұрмыстық зорлық-зомбылық белгілері бар адамдарға бір айға дейінгі мерзімге уақытша тұру мүмкіндігін беру арқылы қолдау көрсету;

5) мемлекеттік отбасы саясатының бағыттары мен шаралары туралы ақпараттық-түсіндіру жұмысы;

6) жергілікті атқарушы органдармен, ұйымдармен, волонтерлермен, консультативтік-кеңесші органдармен мемлекеттік отбасы саясатын іске асыру, тұрмыстық зорлық-зомбылық профилактикасы мәселелері бойынша өзара іс-қимыл жасау;

7) мемлекеттік отбасы саясатының үрдістерін мониторингтеу және талдау;

8) халықты әлеуметтік қорғау және жұмыспен қамту мәселелері жөніндегі жергілікті атқарушы органның үйлестіруімен, өз құзыреті шегінде білім беру, денсаулық сақтау, ішкі істер органдары қатысқан кезде өмірде қиын жағдайға ұшыраған адамдарды (отбасыларды) ерте анықтау және оларға қолдау көрсетуді ұйымдастыру жөніндегі мобильдік топтардың жұмысын ұйымдастыру;

9) тұрмыстық зорлық-зомбылық профилактикасы бойынша өзге де шараларды

Қазақстан Республикасының заңнамасына сәйкес іске асыру жұмыстары жүргізіледі.

Айта кетейік, орталық отбасы институтын қолдау мақсатында, психологиялық, құқықтық және әлеуметтік кеңестер беріп, 6 бағыт бойынша әлеуметтік-құқықтық, әлеуметтік-психологиялық, әлеуметтік-педагогикалық, әлеуметтік-экономикалық, әлеуметтік-еңбек, ақпараттық-консультациялық қызметтер көрсететін болады», - дейді М.Мүтәлпалов.

**Әр адам үшін отбасы ең басты байлығы, баға жетпес қазынасы саналады. Әр отбасы кішігірім мемлекет. Оның өзіндік қалыптасқан ережелері, ішкі ұстанымы мен құндылықтары бар. Қазіргі уақытта осы құндылықты дамыту, отбасын берік ұстауға үгіттеу және отбасыда сыйластық, түсіністіктің қалыптасуына баса мән беру маңызды саналады. Мемлекет басшысы Қасым-Жомарт Тоқаев отбасылық құндылықтарды берік етуге насихаттап, әр жанұяда татулық, өзара құрмет болуын, дәстүр мен тарихқа үңілу керектігін айтқан болатын. Ендіше, Отанның бастауы болған отбасыңыздың нытымағы берік болсын!**

Айгүл РАХМЕТОВА.

ӨШПЕС МҰРА

## Қаратоқа Әбілғазы батыр Итенұлы

**Қаратоқа Әбілғазы батыр Итенұлына байланысты туған жылдарын сұраған екен. Кезінде өз тұсында Маңғыстауға сырттан келген жасуларға қарсы соғыстардың қай- қайсысынан да, Әбілғазы батыр сырт қалмаған.**

Сол кездегі шаруалары жау қайтару болатын, «Адайдың алпыс батыр аламандары» қатарынан берік орын алған, жау шапқанда "Әбілғазы батыр қайда, қай жерде жүр?" деп ізделген, хабар тиген бойда қайдан болса да ұрыс болып жатқан жерге жеткен, тіпті, Көкжар жәрмеңкесінде тәртіп сақтаған болып жүрген орыс әскерлерін сабап, тобымен орыс жазалаушы отрядына шалдырмай кететін жағдайлары да, орыс журналдарына шыққан.

Каспий теңізінде де Адай балықшыларына күн бермеген орыс қарашекпен балықшыларын тәртіпке келтіріп, орыс офицер, шенділерін ұрлап, Хиуаға құлдыққа сатып жіберіп, ал, орыстардың қайта тәуелді болып, сол офицерлерін кері қайтаруын сұрап, қаржы бергендерін, кері әкеліп орыстардың өздеріне сатқан екен. Осының есерінен өзінің екінші баласы Жақыпты, орыстар Форттың түрмесінде аманатқа да ұстаған. Кейін Жақып сол түрмеде өлген. Ал, басы 1835 жылы басталып, 1843 жылы «Мұз қырғыны» аталатын, Әлімнің Кетелерімен болатын ұрыс, одан кейінгі ұзын- ыргасы 17 жылға созылып, 1852 жылғы бұл жолы Әлімдермен, Арал теңізінен бергі Аяққұм- Көгалада болатын ұрыс, Балықшы Балуанияз батыр Мүсірепұлы (1818- 1855 ж.ж.) өлетін, Хиуа хандығы әскерімен болатын ұрыс, одан да кейінгі Кенже Қазбек, Төкештер мен түрікпендердің жекпе жегінде, Адайдың тұ ұсташысы болатын ұрыстардағы көптеген жағдайлар әлі толық жазылмай жатыр. Өзірге Әбілғазы батырдың туған жылдары туралы дәл анықтама табылған жоқ. Мен Әбілғазы батыр Итенұлын 1805 -1810 жылдардың маңында өмірге келген деп жазып жүргенім бар. Ол 1870 жылғы Иса-Досан көтерілісіне, жасы ұлғайған соң қатыспай, Қаратоқа руынан Өтеміс батырға қару-жарақтарын тапсырып, оның өзін жіберген деп айтылады. Соған қарағанда 1870 жылдары тірі болуы керек. Жерленген жері Құлсарының маңындағы, Жаңа таң (бұрынғы Коммунизм таңы) жолының бойындағы 20 шақырымнан, солға қарай бұрылғанда 3 шақырымдай жердегі төбенің басы, Жем өзені бойына жақын, Қарағай- Молхат деген жерде, жаз жайлауда

отырғанда қайтыс болған. Нұрлан архивтерді де көп ақтаратын жігіт, бұрын да Әбілғазы батыр 1805-1810 жылдардан бұрынырақ туған деп жүретін. 1799 жылмен арасы көп емес, 6-11 жылдың маңы. Мүмкін, ол бір жерден көрген болмаса. Кейде туған жыл біреулердің айтуы бойынша немесе құрдасы бөленше едіден де шығып, кейде келіндерінің сәлем еткеннен де жасы үлкен- кішілігі анықталатыны болады. Мысалы, Жаманадай Нұрым Шыршығұлұлының туған жылы, Кеше жары Мұрын жыраудың айтуы бойынша, «Ол менен 29 жас үлкен еді» дегеннен шығарған. Мұрын жырау Сеңгірбекұлының туған жылын, ол кезде 1860- жылғы деп есептеп, Нұрымды 1831 жылы туған деп шығарған. Ол бұрынғы кітаптарға Нұрым Шыршығұлұлы (1831-1908 ж.ж.) деп еніп кеткен. Кейін Мұрын жырау Сеңгірбекұлының өмір сүрген кезі (1859- 1954 ж.ж.) жылдар екені анықталды. Олай болса Жаманадай Нұрым ақын Шыршығұлұлы (1830-1907 ж.ж.) болуы керек. Жалпы, Адай батыр, би, балуан, бағлан, бай-мырзаларының барлығының да туған, қайтыс болған жылдарын қайта анықтап, ре-визиялау керек. Бұрынғы шежірешілер есепке жүйрік болмады ма, көп қателескен. Ұрыс, дау, оқиға болған жылдар да ертүрлі айтылады. Мысалы, Бекет ата Мырзағұлұлының да туған жылы, 1750 жылдан біраз ілгері сияқты. Бұл туралы Нұрлан Құлбаев екеуіміздің жобаларымыз қатарға жақын. Бұрынғылар 1953 жылы Маңғыстауға келген орыс топографы П.Алексеевтің жазғаны бойынша жобалап шығарған. Сол кездегі Алексеевтің «Бекет ата қашан қайтыс болды?» деп, сұрағанында, жауап берген біреу, ол бұдан 40 жылдай бұрын қайтыс болды деген екен. Ол анық 40 жыл ма, 47 жыл ма, ол да долбар. Сол 1750 жылға Мұхамбет пайғамбардың 63 жасын қосып, Бекет атаны 1813 жылы қайтыс болған деп жүр. Ескелді Саназар, Жаңай Қожаназар, Айтқұл Атағозы батырды Жем бойына алғаш келгендер тобындағы Жары Шотанмен құрдас қылып, барлық шежіре, кітаптарда 1704- ші жылғы деп жүр. Ал, Қожаназар Кенже Қонаймен қатар, құрдас, замандас, дос делінеді. Қонай батыр жазбаларда өзірге 1731- ші жылғы. Олай болса Қожаназар да сол деңгейде болуы керек. Қазақ тарихында Байбақты Сырым батыр Датұлы 1712 жылғы деп, барлық кітап, оқулық, өңгімелерге енгізіп жүр. Сол Сырым батырдың көтерілісі тарихта 1783-1797 жылдары ұйымдастырылған. Оған нансақ ол кезде Сырым көтерілісі 71-85 жасында басқарған болып шығады. Ол ешқандай да мүмкін емес жағдай. Батырлар 45-50- ден кейін жауға шаппаған. Балтабай

Адамбаев Сырым жөнінде кітап жазғанда, Малайсары би жасың 70- ке жетпесін деп, бата беріпті деп, 10 жылға жаңылысқан. Ал, дұрысы, Малайсары би «Жасың алпысқа жетпесін» деп, бата берген. Ол: «Арқаң қара нардай жауыр болсын, Мінезің қара жердей ауыр болсын, Өкпең жоқ, бауыр болсын. Үйіңнің сыртынан дубір кетпесін, Құлағыңнан сыбыр кетпесін, Жасың алпысқа жетпесін!», - деп айтылады. Себебі, Сырымның менің жасымды неге шектеп отырсың дегеніне, оған Малайсары би, «Мен сенің жасыңды шектеп не қыламын, бірақ, 60- қа келіп қартайғанда, сенің сөзіңді өз балаң мен келіңің де тындамайды екен» деп айтатыны бар. Сол қасиетті адамның әзілдеп болса да, берген батасына сай, Сырымның жасы 60-қа жетпей, 59 жасында, Хиуа ханының тапсырмасы бойынша, Үргеніш қаласының маңында, үзегісіне у жағылып, содан аяғы күл болып ісіп, өлген. Байбақты руы жарлы ел, «Екі Байбақтының біреуін жарлылыққа көресің . . .» деген сөз бар. 1801 жылы Сырым батыр өмірден өтіп, 1802- ші жылы Байбақтылар Сырымның бір жылдық сада-қасында асын бере алмаған. Содан, келесі 1803 жылы Қарақұмда нағашым еді деп, Жаңай Қожаназардың баласы Шомақ бастап асын берген. Сонда, Шомақ тек сойысқа деп, 100 жылқы, 1000 кой берген, қалған Адайдың бергендері өз алдына. Бұл туралы бұрын да жазып жүрмін. Бұл жерде де Адай шалдарының жаңылысқан сөздері болды. Негізі, Шомақ Байбақты Шоланның да, оның баласы Даттың да кемпір қызын алған емес, Сырым батырдың қызын алған, күйеуі. Бұл туралы Жаңайларға да жаздым. Ал, 1783-1997 жылдары болатын Сырым көтерілісіне, шалдар 1704 жылы туды деп жүрген, Айтқұл Атағозы батырдың қолды 79-93 жасында бастап баруы тіпті де мүмкін емес. Айтқұл Атағозы батыр мен Байбақты Сырым батыр екеуі қатар, тұстас, замандас, дос, құрдас дегуе келеді. Екеуі де 1742 жылғы. Қазір қазақ тарихшылары да Сырым батырдың туған жылын 1742 жыл деп, толық болмағанмен басшылыққа алып, оның 250 жылдығын той-лады. Ал, Қосайлар Атағозы 1704 жылы туған деп басшылыққа алып, биыл күзде оның 320 жылдығын тойлады. Оларға не дерсің?! Ия, айта берсе Адай, қазақ тарих, шежіресінде ойланып, түзететін жерлер көп. Тек оны қолдап, дәлелдеп, іске асыратын, біріккен Адай, болмаса Маңғыстау тобы жоқ, Ия, айта берсе түзететін сөз көп, жыл уақыты көп.

Серікбай ӨНЕС,  
Шетпе ауылы.

## ХАБАРЛАНДЫРУ

«Тепке» ЖШС жобалар бойынша қоғамдық тыңдаулар өткізілетіндігі туралы хабарлайды: Атмосфераға ластаушы заттардың РШН жобасына түзету және экологиялық бағалау материалдарымен ӨЭББ, ҚББ; ҚОҚЖ және қоршаған ортаны қорғау бөлімдері. Учаскенің географиялық координаттары және әсер ету аумағының географиялық координаттары: 45°08'52", 54°47'26".

Қоғамдық тыңдаулар: 2025 жылғы 20 наурызда сағат 14:00-де өтеді.

Өткізу орны: Маңғыстау облысы, Маңғыстау ауданы, с. Сайөтес, мәдениет үйінде өтеді.

Платформа ZOOM: <https://us05web.zoom.us/j/83989433373?pwd=TfREFnn2QESEhNFQzSzU9b98d9Fja.1>

Конференция идентификаторы: 839 8943 3373

Кіру коды: G6jdQ9

Тұтынушы: «Тепке» ЖШС, Ақтау қаласы, 12-ш/а, 79/1 ғимарат, 203-кеңсе. тел: 8-702-400-40-10. БСН 071140024759

Жобаны әзірлеуші: «Рекорд Консалт» ЖШС, Ақтөбе қ. Маресева, 38. бөл. 7, тел: 87014848005. БСН 100740003476

Құжаттама <https://ecportal.kz> порталында және <https://www.gov.kz/memleket/entities/mangystau-eco/documents/> интернет-ресурста

Материалдарды сұрауға болатын электрондық пошта мекен-жайы және телефон нөмірі: too\_record\_konsalt@mail.ru, 87014848005

Ескертулер мен ұсыныстар <https://ecportal.kz>, және электр ЖАО мекенжайы s.bazarbay@mangystau.gov.kz. сайтында қабылданады.

## ОБЪЯВЛЕНИЕ

ТОО «Тепке» сообщает о проведении общественных слушаний-по проектам: Корректировка проекта НДВ загрязняющих веществ в атмосферу с материалами экологической оценки ПУО, ПЭК, ППМ с разделами охраны окружающей среды.

Географические координаты участка и географические координаты территории воздействия: 45°08'52", 54°47'26".

Слушания состоятся: 20 марта 2025 года в 14:00 часов

Место проведения: Мангистауская область, Мангистауский р-н, с. Сайөтес, дом культуры

Платформа ZOOM: <https://us05web.zoom.us/j/83989433373?pwd=TfREFnn2QESEhNFQzSzU9b98d9Fja.1>

Идентификатор конференции: 839 8943 3373

Код доступа: G6jdQ9

Заказчик: ТОО «Тепке», г. Ақтау, мкр. 12, зд. 79/1, офис 203. Тел. 8-702-400-40-10. БИН 071140024759.

Разработчик: ТОО «Рекорд Консалт», Ақтөбе қ. Маресева, 38, бөл.7, тел: 87014848005. БИН 100740003476

Документация размещена на портале <https://ecportal.kz> и интернет-ресурсе <https://www.gov.kz/memleket/entities/mangystau-eco/documents/>

Адрес электронной почты по которой можно запросить материалы:

too\_record\_konsalt@mail.ru, 87014848005.

Замечания и предложения принимаются на <https://ecportal.kz>, и электр адрес МИО

s.bazarbay@mangystau.gov.kz.

БІЛІМ

## ОҚУШЫНЫ ЗЕРТТЕУШІЛІККЕ БАУЛУ БАСТАУЫШ СЫНЫПТАН БАСТАЛУЫ ТИІС

**Абай Құнанбаевтың жетінші қара сөзіндегі жас бала анадан туғанда екі түрлі мінезбен туады.**

Біріншісі-ішсем, жесем, ұйықтасам деп тұрады. Екіншісі – көрсем, білсем деп, ер жетіңкірегенде ит үрсе де, мал шуласа да, ол неге өйтеді? бұл неге бүйтеді? деп көз көрген, құлақ естігеннің бәрінен сұрап, тыныштық көрмейді, - деген ой тұжырым оқушының биік танымдық қабілет, тұрмыс-тіршіліктің сырын ұғуға талпыныс баланың ерте жасынан туындайды екен. Сондықтан оқушының ізденушілік, зерттеушілікке баулу бастауыш сыныптан басталуы тиіс.

Өйткені бастауыш сынып оқушысы ізденушілікке баулу, оған зерттеу дағдысы мен білігін игерту бүгінгі білім беру саласының маңызды міндеті болып саналады. Зерттеуші – оқушы өзінің табиғатынан зерттеуге бейім келеді. Білуге құмарлық, бақылау жасауға талпыныс, өзінше эксперимент жүргізуге баланың балалағымен бірге жүретін процесс. Зерттеу, іздену белсенділігі баланың жаратылысына тән табиғи құбылыс.

Бастауыш сынып оқушыларының зерттеушілік іс-әрекеті қазіргі мектеп бағдарламаларында маңызды рөлге ие. Мұның себебі зерттеушілік іс-әрекетті бала қабілетін ашу, үйлесімді тұлға етіп тәрбиелеу мен дамытудың мықты құралы деп танауда деп білеміз. Зерттеушілік іс-әрекет алдын ала шешімі белгісіз және ғылым саласындағы зерттеулерге тән мәселені қою, тақырыпты теориялық зерттеу, зерттеу әдістерін талдау, практикада жүзеге асыру, өз бетінше ақпарат шығармашылық, зерттеушілік міндетті шешумен байланысты іс-әрекет. Оқушы өз бетінше зерттеу жүргізу арқылы қоршаған ортасын тани алады, жаңа білімді дайын күйінде емес, өз үшін жаңа білім ашады. 1999 жылдан бастап, оқушылардың зерттеушілік, ізденушілік, жобалау әрекеті біртұтас жүйе ретінде құрылды. Ал бүгінгі күнде бұл әдістеме оқытудың құзіреттік тәсілі жағдайында ерекше қажеттілікке ие.

**Нұрбану ҚОЙБАҒАРОВА,**  
Тобанияз атындағы жалпы білім беретін мектептің бастауыш сынып мұғалімі.

ЖЕҢІСКЕ – 80 ЖЫЛ

## ТАРИХТАҒЫ МӘҢГІЛІК ЕРЛІК



**Әр адам өзінің елі мен жерін, Отанын мақтанышпен айтады.**

Қазіргі қазақ жерінде тұрып жатқан әр азамат ең бақытты жандардың қатарында. Биыл әлем тарихындағы ең сұрапыл соғыстың аяқталғанына 80 жыл толып отыр. Бұл кезеңде тек жеңістің салтанаты ретінде атап өту ғана емес, сонымен қатар сол кездегі адамдардың ауыртпалығын түсініп, елдің бейбіт өмірге қалай жеткенін бағалау керек.

Екінші дүниежүзілік соғыс

кезінде қаншама жан құрбан болып, түрлі ауыртпалықтарға төтеп берді. Көптеген отбасылар аға-іні, бауырларынан, әкелерінен айырылды. Жас қыздар мен әйелдер әкесіз, ағасыз, асыраушысыз қалды. Біз аңсаған бейбітшіліктің қаншалықты қиындықпен келгенін қастерлеуіміз керек. Бұл соғыс халқымызға бейбітшілік пен тұрақтылықтың маңызды екенін айқын көрсетті. Жеңістің құны қаншалықты қымбат болса, бейбіт өмірдің қадірі соншалықты үлкен.

Болашақ ұрпақ, жастарымыз осы тарихты құрметтеп, өткенді ұмытпай, соғыстың зардаптарын ұғынып, бейбіт өмірдің маңызын түсіну қажет. Олардың бұл құндылықтарды өз жүректерінде сақтап, оларды болашақ ұрпаққа жеткізуі маңызды. Өйткені, тарихты ұмытпау, одан сабақ алу – болашақ үшін ең үлкен игілік.

Жеңістің 80 жылдығын атап өту – бұл тек еске алу емес,



соғыс кезінде қайтқан аталарымыз бен аналарымыздың рухына тағзым ету. Олардың ерліктерін ұлықтап, олардың үлгісінен тағылым алу – біздің парызымыз. Соғыстың зардаптарын түсіну арқылы, бейбіт өмірді сақтау жолында жұмыс істеп келешекке сеніммен қарай аламыз. Тек осылай ғана біз өз тарихымызды қадірлеп, болашақ ұрпаққа бейбітшілік пен тұрақтылықтың құндылығын жеткізе аламыз.

**Жаңылхан ОРЫСБАЕВА,**  
Өтес жалпы білім беретін мектептің бастауыш сынып мұғалімі.

АДАМ. ҚОҒАМ.ЗАҢ.

Қылмыстық іс бойынша жәбірленуші болып танылған адамның өтемақы алуға құқығы бар екенін бірі – білсе, бірі – біле бермейді.

## ҚЫЛМЫСТЫҚ ІСТЕГІ ЖӘБІРЛЕНУШІНІҢ ӨТЕМАҚЫ АЛУҒА ҚҰҚЫҒЫ БАРЫН БІЛЕСІЗ БЕ?



ҚР-ның 10.01.2018 жылғы «Жәбірленушілерге өтемақы қоры туралы» Заңының (бұдан әрі-Заң) аясында 01.07.2020 жылдан бастап жәбірленушілерге өтемақы төлеу рәсімі басталды.

Жәбірленушілерге өтемақы қоры – салықтық емес түсімдер, яғни сот өндіріп алатын мәжбүрлі төлемдер; өзіне қатысты соттың айыптау үкімі заңды күшіне енген және түзеу жұмыстары түрінде жаза тағайындалған сотталған адамнан ақшалай өндіріп алулар және регрестік талаптар тәртібімен өндіріп алынған ақша және Қазақстан Республикасының заңнамасында тыйым салынбаған өзге де көздері арқылы қалыптастырылады.

Осы Заңның 6-бабына сәйкес зорлық-зомбылықпен байланысты қылмыстар бойынша жәбірленушілер болып табылатын көмекке толмағандарға, адам саудасымен және азаптаулармен байланысты қылмыстар бойынша жәбірленушілер деп танылған адамдарға, денсаулығына ауыр зиян келтірілген не адамның иммунитеті тапшылығы вирусын (АИТВ/ЖИТС) жұқтырған адамдарға, жәбірленуші қайтыс болған жағдайда, жәбірленушінің құқықтары берілген (жәбірленушінің заңды өкіліне) адамдарға өтемақы тағайындалады.

Одан басқа, ҚК-тің 106, 114-бабы 3-бөлігінде, 118-бабы 2,3-бөліктерінде, сондай-ақ 116, 119, 120, 121, 125, 126, 127, 128, 135, 141, 146, 192, 202, 203, 255, 261, 269, 270, 277, 317, 319, 320, 322, 344, 345, 345-1, 346, 350, 351, 352, 355, 356, 358, 359-баптарында көзделген қылмыстық істердің денсаулыққа ауыр зиян келтіру бөлігінде жәбірленуші болып танылған адамдарға тағайындалады.

Ал, жоғарыда атап көрсетілген жәбірленушілерге өтемақы айлық есептік көрсеткіштің 30-дан 50-ге дейінгі мөлшерінде тағайындалады.

Сондай-ақ, адам жәбірленуші деп танылғаннан кейін ол қылмыстық қудалау функцияларын жүзеге

асыратын мемлекеттік органға өзіне өтемақы тағайындау туралы өтініш жасауға құқылы.

Өтемақы тағайындау мынадай құжаттар негізінде жүргізіледі:

- 1) жәбірленушінің немесе жәбірленуші құқықтары берілген адамның өтініші;
- 2) жәбірленушінің жеке басын куәландыратын құжаттың не өтемақы алуға жәбірленуші құқықтары берілген адамның жеке басын және құқығын растайтын құжаттардың көшірмелері;
- 3) жәбірленушінің немесе жәбірленуші құқықтары берілген адамның банктерде немесе банк операцияларының жекелеген түрлерін жүзеге асыратын ұйымдарда ашылған банктік шотының нөмірі туралы мәліметтер;
- 4) қылмыстық процесті жүргізетін органның адамды жәбірленуші деп тану туралы қаулысының көшірмесі;
- 5) жәбірленушінің денсаулығына келтірілген зиянның сипаты мен ауырлық дәрежесін растайтын құжаттың көшірмесі;
- 6) жәбірленуші қайтыс болған жағдайда, оның қайтыс болуы туралы куәліктің немесе жәбірленушінің қайтыс болғанын растайтын өзге де құжаттың көшірмесі.

Айта кететіні, адам жәбірленуші деп танылған күннен бастап үш жылдық ішінде өтініш бере алады. Өтініш беру мерзімін өткізіп алған жағдайда, жәбірленуші не жәбірленушінің құқықтары берілген адам Қазақстан Республикасының заңнамасында көзделген тәртіппен өткізіп алған мерзімді қалпына келтіру үшін сотқа жүгінуге құқылы.

Сол себептен, еркім өз құқығын қорғай білуі тиіс. Бұл заң талаптарын халық назарына алдағы уақытта өз қажеттілігіне жаратар деген мақсатта түсіндірме ретінде жеткіземіз.

**Г.БЕРІШБАЕВА,**  
прокурор.

ДІН - ДІҢГЕК

## РАМАЗАН АЙЫ – БЕРЕКЕ МЕН РАҚЫМ АЙЫ

**Бұл — ислам әлеміндегі ең қасиетті және рухани мәні зор ай, мұсылмандар Ораза тұтып, Алланың рақымы мен кешірімін сұрайды, жан дүниесін тазартуға тырысады. Құран Кәрімде Алла Тағала мүміндерге ораза тұту жайында былай дейді:**

«Әй, мүміндер! Сендерге бұрынғыларға парыз қылғандай ораза парыз қылынды. Өрине, сақтанарсыңдар». (Бақара сүресі, 183-аят)

Пайғамбарымыз (с.ғ.с) бір сөзінде: «Кім Рамазан айының оразасын шын иман және ықыласпен ұстаса, оның бұрын істеген күнәлары кешіріледі» Рамазан айының артықшылықтары тек діни ғана емес, адамгершілік, әлеуметтік және денсаулық тұрғысынан да үлкен маңызға ие.

1. Алланың рақымына бөлену Рамазан айы — мұсылман үмбетінің жаратушысына жақындап, оның көңіліне сұрайтын ай. Бұл айда Алланың рахметі мен кешірімі ерекше көп болады. Пайғамбарымыз (с.ғ.с) өзінің бір хадисінде үмметін былай деп сүйіншілейді: «Кімде-кім Рамазан айында шынайы сеніммен, сауапты бір Алладан ғана күтіп, ораза ұстаса, бұрын-соңды жасаған күнәлары түгелдей кешіріледі»

2. Оразаның рухани маңызы Ораза ұстау тек физикалық тұрғыдан шектеу емес, ол адамды рухани тұрғыда тазартады. Рамазан айында мұсылмандар



күні бойы ішіп-жеуден, жаман сөздерден, жаман ойлардан, тіпті жаман әрекеттерден де аулақ болады. Бұл ораза ұстаушыны сабырлыққа, ұстамдылыққа, өз-өзіне бақылау жасауға үйретеді. Осылайша, адам өз жаман әдеттерінен арыла отырып, өзін рухани жағынан жаңартады.

3. Кедейлерге көмек көрсету Рамазан айы – мұқтаждарға көмек қолын созу үшін де тамаша уақыт.

Мұсылмандар осы айда зекет беріп, садақа жасайды. Кедейлер мен жетімдерге көмектесу, оларды құшақ жаяу қарсы алу – мұсылмандықтың басты қағидаларының бірі. Рамазан айы осы тұрғыдан әлеуметтік бірлік пен ынтымақтастықты нығайтады. Бұл айда көпшілік жиналып, бірігіп ауыз ашып, ортақ дастарқан басында бірге отырады.

4. Оразаның денсаулыққа да көптеген пайдасы бар.

Күні бойы ішіп-жеуден бас тарту организмді тазартуға, ас қорыту жүйесін демалтуға, артық салмақтан арылуға көмектеседі. Сонымен қатар, ораза ұстау адамның физикалық күшін арттырады, себебі ол жан мен тәннің үйлесімділігін қамтамасыз етеді. Бірақ ораза ұстағанда дұрыс тамақтану, су ішу режимін сақтау өте маңызды.

5. Қоғамдық және отбасылық байланыстар Рамазан айы отбасы мен қоғамдағы қарым-қатынастарды нығайтуға да ықпал етеді. Ораза кезінде көпшілік бір-бірімен ауыз ашып, дастарқанда бірге болуды дәстүрге айналдырады. Бұл өз кезегінде адамдар арасындағы махаббат, сыйластық пен түсіністікті нығайтады. Рамазан айы отбасылар үшін бірге уақыт өткізуге мүмкіндік береді.

6. Таңсәриде ояну және рухани тәртіп Рамазан айы мұсылмандарды таңсәриде оянып, ауыз бекітуге және күн батқанда ауыз ашуға тәрбиелейді. Бұл әдет адамды тәртіпке, уақытты тиімді пайдалануға және өмірге жауапкершілікпен қарауға үйретеді.

Рамазан айы – бұл тек ораза ұстап, діни міндеттерді орындау ғана емес, сонымен қатар, адамгершілік, рухани және әлеуметтік өмірді жаңарту мен жақсартуға арналған ай. Ол мұсылмандарға жүрек тазартуға, жан дүниесін дамытуға, Алланың рақымын іздеуге мүмкіндік береді. Рамазан айының артықшылықтары тек жеке тұлға үшін ғана емес, қоғам үшін де зор мәнге ие. Алла баршамызды Рамазан айына төрт көзіміз түгел жетуді нәсіп етсін.

**Дархан ТАУШАНОВ,**  
Шетпе мешітінің бас имамы.



ӨНЕР



**Қазақтың дәстүрлі өнөр**і ғасырдан ғасырға, ұрпақтан ұрпаққа, атадан балаға мирас болып, бүгінге дейін өзінің сабақтастығын тауып келе жатыр. Шайыр ауылдық мәдениет үйі қазақ өнерінің өрісін кеңейтіп, өресі мен тұғырын биіктетуге үлес қосып келеді.

## Жас таланттардың жетістігі

Шайыр ауылдық мәдениет үйі жанынан жұмыс жасайтын «Шабыт» дәстүрлі әншілер ансамблінің құрамындағы өнерлі оқушылар аудандық, облыстық, республикалық деңгейдегі түрлі байқаулардан жүлделі орын алып, ауыл мәдениетінің қоржынына олжа салып жүр. Жуырда өткен «Дарабоз» республикалық балалар мен жасөспірімдер арасындағы

өнер байқауында «Дәстүрі ән» жанры бойынша Дәуіт Бейбарыс бас жүлдені қанжығасына байласа, Амантай Санжар 2-орынды иеленді. Сондай-ақ «Шайыр шабыты» ұлдар ансамблі «Алғыс хатпен» марапатталды. Өнерлі өрендеріміз Алматы қаласында өтетін суперфиналға және Парижге жолдама ұтып алды.

ӨЗ ТІЛШІМІЗ.

ПАТРИОТ БОЛУ – ПАРЫЗЫҢ

## ОТАНСЫЗ АДАМ – ОРМАНСЫЗ БҰЛБҰЛ

алғашқы әскери дайындық кабинеті ашылды

**Аудан жұртшылығына Есенамановтар әулеті кеңінен танымал. Қызылғұл ата заң саласының құрметті ардагері, марқұм есімі жұртшылыққа етене таныс. Ол саналы ғұмырын тәртіп пен заң саласына арнап, өлкеге қатысты тың деректерді ашып, жариялады.**



Жергілікті ішкі істер бөлімінде басшылық етіп, артынан ізбасар буын тәрбиеледі. Осындай ерен еңбегінің арқасында өлкеге танымал құқық саласының майталман маман иесі бола білді. Қызылғұл Есенаманов 1919 жылы Маңғыстау ауданы Ұланақ жерінде дүниеге келген. Соғыс және еңбек ардагері.

1932 – 35 жылдары «Ұланақ» серіктестігінде жұмысшы, 1946 – 77 жылдары Маңғыстау ауданы 2-бөлімінде қызметкер, 1977 – 89 жылы Шетпе ауылдық кеңесінде жүргізуші болды. Қызыл жұлдыз 1943 жылы 1-дәрежелі Отан соғысы ордендерімен, бірнеше медальдармен марапатталған. Өмірінің соңына дейін 30 жыл бойы үзбей Маңғыстау аудандық ішкі істер бөлімінде қызмет атқарды.

Осындай ерен еңбек иегеріне өлкеміздегі «Жармыш жалпы білім беретін мектеп» КММ-нен алғашқы әскери даярлық кабинетінің жасақталып, ашылуы ұрпақтарының қолға алған игі істің бастауы еді

Кабинеттің ашылу салтанатында атаның ұрпақтары мен аудандық ішкі істер бөлімінің басшылары, ұйым мүшелері, мектеп мұғалімдері мен оқушылары қатысты. Қызылғұл атаның қалтқысыз қызметтері тұрғысында зейнеткер полиция майоры

Әбілханов Тоғай ағай мәнді естеліктер айтты. Мектеп басшысы Абдуллаева Қалдыгүл мен мектеп мұғалімдері өздерінің жүрек жарды тілектерін арнады

Маңғыстау аудандық ішкі істер бөлімінің басшысы Есенаманов Қызылғұлдың аудан үшін жасаған еңбектерін ерекше атап, жиналған қауымға үлгі етті. Өлке тарихынан сыр шертетін кабинеттің ашылу лентасы қиылып, атаның ақ жаулықты келіндері шашу шашты. Мектеп оқушылары жаңадан жабдықталған әсем кабинеттің қабырғасына орнатылған тарихи танымдық стенділердімен танысып, сап түзу жаттығуларын орындады.

Шараның ұйымдастырылуына көмек қолын созып жүрген атаның немересі болашақта атқарылатын жұмыстар жайлы айтып өтті. Жиын соңында мақсаты бір жандар бірге естелікке суретке түсті. Ұстаз, ата-ана, оқушы бірлесіп атқаратын жұмыстардың бағыты айқындалды.

Гүлшат МАНАШЕВА,  
ағылшын тілі пәнінің мұғалімі.

ҰЛТТЫҚ СПОРТТЫҢ ӨРКЕНДЕУІ

## ЕРЛІК ДӘСТҮРІН ЖАҢҒЫРТҚАН ШАБАНДОЗДАР

**Т**арихы ғасырлар бойы қалыптасып, қазақ халқының мәдениеті мен дәстүріне терең еніп, ересектердің күшін, батылдығын және шеберлігін сынайтын қазақтың ұлттық ат спорт түрі көкпардан аудан әкімдігінің қолдауымен, мәдениет, дене шынықтыру және спорт бөлімінің ұйымдастыруымен облыстық жаппай көкпар жарысы өтті.



Ұлттық спортты насихаттау мен дамыту мақсатында тартысты бәсекеге облыстың әр қаласы мен ауданынан 60-қа жуық көкпаршы қатысты. Қатысушылар ересектер мен жасөспірімдер болып екі топқа бөлініп, алаңда шеберлік пен ерік-жігерін байқатып, жоғары деңгейдегі дайындықтарын көрсетті.

Қазақтың ерлік пен батырлықты бейнелейтін ұлттық спорт түрін меңгерген қатысушылар арасынан топ жарып ересектер арасынан 6 салым салған Маңғыстау ауданының Тұщықұдық ауылынан келген Жасұлан Қуанышұлы үздік нәтиже көрсетіп, салымшылар арасында бірінші орынға ие болды. Ал жасөспірімдер арасындағы тартыста Мұнайлы ауданынан келген Жандаулет Әшімхан 7 салыммен «үздік салымшы» атанды.

Жарысқа қатысқан әрбір көкпаршы өз өнері мен дағдыларын ұлттық спорттың өркендеуіне қосқан үлес ретінде қабылдады. Алаңдағы тартысты әрі қызықты сәттер көрерменге ерекше әсер қалдырып, көкпардың орны мен маңызын айқындап берді. Ұлттық спорт түрін дамыту мен оны кеңінен таныту мақсатында ұйымдастырылған осындай іс-шаралар келешекте де көптеп өткізіліп, жас ұрпақтың ұлттық мұрамызға деген қызығушылығын арттыруға ықпал ететіні сөзсіз.

Е.ЖҰМАҒҰЛОВА.

## МҰРАГЕРЛЕРІН ІЗДЕУ

Нотариус Ауданбаева Г.А. 2022 жылы 20 қарашада қайтыс болған **АБДУЛЛАЕВА ЖИБЕК РАХМАНОВНАНЫҢ** мұрагерлеріне іздеу салады. Барлық мұрагерлеріне осы хабарлама шыққан күннен бастап 1 ай мерзім ішінде Маңғыстау ауданы, Шетпе селосы, Орталық ш/а №1 үй, 4 пәтер мекен-жайы бойынша нотариус кеңсесіне хабарласуын сұрайды. Тел: 8 702 3039080.

№?

## Құрметті оқырман!

«Маңғыстау-Медиа» ЖШС басылымдарына жарнама, хабарландыру беру немесе ақпарат алу үшін

мына байланыс телефондарына  
қоңырау шалсаңыз болады.

87781459093. 8(7292)204842.  
8(7292)204834. pr@ogni.kz.



МЕНШІК ИЕСІ:  
**MAŃGYSTAÝ MEDIA**  
Директор  
Гүлмира ӘБИШЕВА  
Қабылдау бөлімі,  
тел./факс: 20-48-34,  
mangystau.media@mail.ru

**Жаңа ӨМІР**  
аудандық қоғамдық-саяси газет  
Редактор –  
Айгүл РАХМЕТОВА  
Тілші Е.ЖҰМАҒҰЛОВА  
Газет «Маңғыстау-Медиа» ЖШС  
Ақпарат және дизайн  
орталығында беттелді.  
Беттеуші дизайнер –  
Асем РАБАЕВА

Газет Қазақстан Республикасы Мәдениет және ақпарат министрлігінде 6.02.2013 ж. есепке қойылып, №13356-Г куәлігі берілген.  
«Атырау-Ақпарат» ЖШС баспаханасында басылды. 060005, Атырау қаласы, Ж.Молдағалиев көшесі, 29А.  
Тел: 8 7122 458-660, 586-392.  
Талсырыс нөмірі: 0162  
Таралымы: 378  
Индекс: 65612  
газет бағасы келісімді

- Газет жарияланымдарындағы автор пікірі редакцияның түпкілікті көзқарасы болып есептелмейді.
- Жарияланған материалдарды сілтемесіз көшіріп басуға болмайды.
- Жарнама, хабарландырулар мазмұнына редакция жауап бермейді.
- Редакцияға жолданған материалдарға ренцензия жасалмайды және қолжазба авторға қайтарылмайды.
- Тақырыптық суреттер ғаламтордан алынады.

АВА РАЙЫ БОЛЖАМЫ	
13 ақпан	түнде: -7   күндіз: +1
14 ақпан	түнде: -3   күндіз: +1
15 ақпан	түнде: -3   күндіз: +2
16 ақпан	түнде: -1   күндіз: +7
17 ақпан	түнде: +1   күндіз: +9